

四庫全書

子部

欽定四庫全書

名賢氏族言行類稿卷四十六

宋 章定 撰

謝 九百三

姓纂姜姓炎帝之胄申伯以周宣王舅受封於謝今
汝南謝城是也後失爵以國為氏焉魯有謝息

後漢謝弼字輔宣中直方正為鄉邑所宗師建寧中詔
與有道之士對策除郎中

謝該字文儀明春秋左氏為世名儒門徒數千百人

方術謝夷吾字堯卿舉孝廉為壽張令遷鉅鹿太守所
在愛育人物有善績第五倫令班固為文以薦之云
才兼四科行包九德誠社稷之元龜大漢之棟甍

晉謝鯤字幼輿好老易善鼓琴為豫章太守泣政清肅
百姓愛之一丘一壑自謂過庾亮

謝尚字仁祖八歲神悟夙成父鯤嘗攜之送客或曰此
兒一坐之顏回也脫畧細行不為流俗之事

謝安字安石少有重名放情丘壑自然有公輔之望

高卧東山諸人每言安石不肯出將如蒼生何安
妻見家門貴盛而安獨靜退謂曰丈夫不如此也安
掩鼻曰恐不免耳年四十餘桓温請為司馬既到
温甚喜言生平歡笑竟日既出温問左右頗嘗見我
有如此客不温後詣安值其理髮安性遲緩久而方
罷使取幘温見留之曰令司馬著帽進其見重如此
苻堅百萬次於淮肥為征討大都督方圍棋賭別

野夜還指投將帥各當其任 及謝玄破賊驛書至
安對客圍棋了無喜色及罷還過戶限心喜甚不覺
屐齒之折乃其真也 文雅過王導東山之志始末
不渝 捉蒲葵扇而價增數倍 子琰

謝琰字瑗度弱冠以貞幹稱有軍國才用為會稽內史都
督五郡 子混字叔源歷尚書左僕射 奕字無奕豫
州刺史 子玄字幼度叔父安嘗約子姪曰子弟亦何
豫人事而正欲使其佳玄曰譬如芝蘭玉樹欲使其生

於庭階耳其使才雖履屐間亦得其任 以精銳八
千破苻堅百萬於淮肥聞風聲鶴唳以為王師至

謝萬字萬石早有時譽領淮南太守王羲之曰萬才流
經通處廊廟參諷議故是後來一器今屈其邁往之
氣以俯順荒餘近是違才易務矣謝氏尤秀彥者稱
封胡羯末

謝朗字長度善言玄理文義艷發終東陽太守

謝綯字宣映曾戲調其舅素湛湛曰汝父昔已輕舅汝

今復加我可謂世無渭陽情也

謝石字石奴累遷尚書僕射

謝邈字茂度剛鯁無所屈撓累遷侍中

謝沉字行思會稽人博學士明練經史事母至孝徵

為太學博士

隱逸謝敷字慶緒會稽人澄清寡欲隱於大平山初

月犯少微俄而敷死

王凝之妻謝氏字道韞叔父安嘗內集雪下安曰何所

似也安兄子朗曰散鹽空中差可擬韞曰未若柳絮
因風起 神情散朗有林下風氣

南史謝晦字宣明晉太常哀之玄孫涉獵文義博瞻多
通從武帝征闕洛內外要任恚委之時謝混風華為
江左第一嘗與晦俱在武帝前帝目之曰一時頓有
兩玉人耳 次兄瞻字宣遠六歲能屬文後為豫章
太守與叔混族弟靈運俱有盛名嘗作喜霽詩靈運
寫之混詠之王弘在坐歎以為三絕瞻字宣鏡晦之

弟位黃門侍郎 澹字景恒晦之從叔任達仗氣不

營當世與范泰為雲霞之交後位侍中 裕字景仁

晦從父累遷為左僕射 子恂字泰溫位鄱陽太守

恂子孺子多藝能尤善聲律出為廬江郡辭宋武

帝曰謝孺子不可屈為小郡乃以為司徒主簿 恂

子璟少知名齊竟陵王子良開西邸招文學璟亦預

焉 子微字玄度魏中山王元畧還北梁武帝餞於

武德殿賦詩三十韻限三刻成微二刻便就又為臨

汝侯猷製放生文亦見賞於世後除尚書左丞 純
字景懋景仁弟 純弟彪字景彪位司徒右長史

彪弟述字景先小字道兒與劉湛為異常之交湛每曰
我見謝道兒未嘗足三子綜約緯緯子朏字玄暉少
好學有美名文章清麗善草隸長五言詩沈約常云
二百年來無此詩也遷尚書吏部郎好獎人才孔顛
粗有才筆未為時知孔珪嘗令草讓表以示朏朏嗟
吟良久手自折簡寫之謂珪曰士子聲名未立應共

獎成何惜齒牙餘論嘗直中書省賦詩有蒼苔依砌

上紅藥當階翻之句

見昭明文選

方明裕從祖弟祖鐵

字鐵石位永嘉太守方明體素羸弱而勇決過人為
丹陽尹有能名轉會稽太守不拘文法濶畧苛細務
在統領貴族豪士莫敢犯禁除比伍之坐判久繫之
獄東土稱詠之子惠連年十歲能屬文靈運加賞之
云每有篇章對惠連輒得佳語嘗於永嘉西堂思詩
不就忽夢見惠連即得池塘生春草大以為工嘗為

雪賦以高麗見奇弟惠宣位臨川太守

謝靈運奕之曾孫文章之美為江左第一為太子左衛

率朝廷唯以文義處之為永嘉太守郡有各山水肆

意遊遨理人聽訟不復關懷 每有一首詩貴賤競

寫名動都下徵為祕書監遷侍中 詩書皆兼獨絕

每文竟手自寫之文帝稱為二寶 鑿山浚湖功役

無已常着木屐登山 子鳳鳳子超宗有文辭盛得

名譽武帝曰超宗殊有鳳毛齊高帝以為義興太守

坐公事免詣東府門自通其日風寒高帝謂四坐曰
此客至使人不衣自暖矣 子才卿 才卿弟幾卿
清辯時號神童累遷尚書左丞

謝密字弘微萬之曾孫叔父混異之曰此兒深中夙敏
成佳器有子如此足矣 微子異不傷物同不害正
若年造六十必至公輔 解中庶子加侍中 沈約
曰簡而不失淡而不流古之所謂名臣弘微當之
見美如此 子莊字希逸宋文帝異之謂劉湛曰藍

田生玉豈虛也哉袁淑為鸚鵡賦文冠當時及見莊
賦嘆曰江東無我卿當獨秀又為月賦 莊子肱字
敬沖十歲能屬文永明中為義興太守不省雜事恣
付紀綱曰吾不能作主者吏但能作太守耳梁武帝
詔為侍中司徒尚書令 子諼為東陽內史五官送
錢一萬止留一百答曰數多劉寵更以為愧次子諲
不妄交接門無雜賓有時獨醉曰入吾室者但有清
風對吾飲者唯當明月位右光祿大夫 子哲字頽

豫舉止醞藉襟情朗豁為士君子所重仕陳為吏部尚書郎顥字仁悠拙之弟仕齊歷吏部郎有簡秀之目顥弟淪字義潔後拜吏部尚書 子覽字景滌梁武帝嘗目送之曰覺此生芳蘭竟體後拜吏部尚書出為吳興太守郡境多劫覽下車肅然 覽弟舉字言揚與凡覽俱預元會江淹一見並相欽挹曰所謂馭二龍於長塗者也後遷尚書僕射雖屢居端揆未嘗預時政託情玄勝尤長佛理 子嘏字含茂歷都

官尚書 舉兄子僑字國美父玄大仕梁為侍中僑
素貴嘗一朝無食子啟欲以班史質錢答曰寧餓死
豈可以此充食乎 僑弟札字世高亦博涉文史

謝岐會稽人陳武帝引參機密為尚書右丞

孝義謝蘭字希如陳郡陽夏人五歲時父未食乳母欲
令先飯蘭終不進舅阮孝緒歎曰此兒在家則曾子
之流事君則蘭生之匹因名曰蘭後為蕪散騎常侍

唐謝偃衛州人貞觀初對策高第嘗為麈影賦二篇帝

美其文名見欲偃作賦先為序一篇頗言天下乂安
功德茂盛意受偃使賦偃緣帝指名篇曰述聖其意
蓋規帝成功而自處至難云又撰玉諜真紀以勸封
禪時李百藥工詩而偃善賦時人稱其李詩謝賦

華 九百四

姓纂宋戴公子考父說食采於華因氏焉華督華元
華定華亥並為宋卿

左傳昭二十一年華登以吳師救華氏

宣十二年晉原穀宋華椒曹人同盟於清丘

成十一年華元如楚遂如晉合晉楚之成 十五年華

元為右師元曰我為右師君臣之訓師所司也

華元督之曾孫 華亥元之孫 華喜為司徒 華

椒以宋人救蕭

後漢華佗字元化通數經曉養性之術精於方藥

魏志華歆字子魚為豫章太守為政清靜不煩吏民威

而愛之魏初為御史大夫素清貧祿賜以振施親戚

故人家無儋石之儲 子表字偉容為尚書

吳志華覈字永先吳郡人以文學入為祕府郎

晉華表字偉容遷太常清貞素履有老成之美 子虞

字長駿 虞子恒字敬則清恪儉素雖居顯列常布

衣蔬食年老彌篤 嶠字叔駿才學深博少有令聞

為臺郎徧觀祕籍因作漢紀 中子徹 少子暢相

繼為佐著作郎踵成十典

華譚字令思好學不倦為鄰里所重舉秀才除郎中為

郊令境內饑饉傾心撫卹甚有政績

華軼字彥夏少有才氣聞於當世汎愛博納士論美之
歷江州刺史甚有威惠得江表之歡心 流亡之士

赴之如歸

南史華皎御下分明善撫綏以戰功進爵為侯

孝義華寶晉陵無錫人也

北史孝行華秋事母以孝聞母喪廬墓負土成坟詔表
其門閭後盜起往來廬之左右咸相誠曰勿犯孝子

鄉

霸

九百五

益部耆舊傳有霸相

射

九百六

三輔決錄云後漢末鴻臚謝服天子以服為將軍出征
不祥改姓射名咸

夏

九百七

又音上聲事見上聲門中

夏后氏之後

柘 九百八

大夫以地為氏急就草漢有柘温舒

耳

九百九
所嫁反

風俗通云新鄭人楊耳村在縣西二十五里邢山東

向 九百一十

姓纂宋桓公子向父盱盱孫向戌為左師子孫氏焉
向魁宋司馬向戌之曾孫向為人向寧向鄭向宜並
其後也

左傳成十五年宋向為人為大司寇向帶為太宰華元
使向戌為左師樂喬為司寇

哀十二年宋向巢帥師伐鄭

後漢獨行向栩字甫興性好老子狀如學道又似狂生
公府辟不到後特徵拜趙相畧不視文書舍中生蒿
菜徵拜侍中每朝廷大事侃然正色百官憚之

逸民向長字子平讀損益卦喟然嘆曰吾已知富不如
貧貴不如賤男女嫁娶既畢勅斷家事勿相關肆意

遊五嶽名山

蜀志向朗字巨達襄陽人少以吏能見稱為巴西牂牁
房陵太守潛心典籍年踰八十猶手自校書 開門
接賓誘納後進 子條字文豹亦博學多識為御史
中丞朗兄子寵諸葛亮表曰將軍向寵性行淑均曉
暢軍事試用於昔先帝稱之曰能愚以為營中之事
悉以諸之必能使行陣和睦優劣得所遷中領軍
寵弟充歷射聲校尉尚書

晉向雄字茂伯為御史中丞

向秀字子期雅好莊老之學後為侍郎

南史向靖字奉仁征廣固討盧循所在著績官至散騎

常侍 立身儉約無園田商貨之業時人稱之 子

柳字玄季有學義才能立身方雅

宋朝向敏中字常之開封人也父瑀惟一子教督甚嚴

嘗謂其妻曰大吾門者此子也舉進士第太宗飛白

書敏中張詠二名付中書語宰相曰此二臣者名臣

也朕將用之矣拜右諫議大夫同知樞密院事至真宗拜同平章事東封西祀皆留守京師天禧元年進左僕射時真宗使人密覘之云敏中方謝客門闌悄然無一人在真宗笑曰向敏中大耐官職敏中諸子不使當事任雖處大事若己不與避遠嫌勢謹於薦拔大任幾三十年時論目為重德蕙謚文簡子傳正傳式傳亮傳範傳亮子經官至定國軍留後謚曰康懿經女即欽聖憲肅皇后也敏中累贈燕王傳

亮周王經吳王

隨筆云當真宗朝自敏中之前拜僕射者六人時李
昌武宗諤死四年矣文簡諸子名連傳字傳生係
係生宗欽聖憲肅兄弟也宗
生子子生水水生土土生公

尚 九百十一

姓纂姜姓齊太公之後號太師尚父其支孫因氏焉

後漢高士尚長 唐戶部尚書衡生振總尚長之後

唐尚獻甫衛州汲人善占候武后召見由道士擢太史令

尚可孤東部鮮卑宇文之別種

諒 九百十二

後漢諒輔字漢儒廣漢人仕郡為五官掾時旱輔自暴
日中積薪構火將自焚須臾澍雨世以此稱其至誠

暢 九百十三

陳留風俗傳有暢氏齊有暢惠明撰論語義注 唐戶
部尚書暢瓘尚書左丞暢悅瓘子常當當進士擢第
為太常博士悅子偃並河東人

伉 九百十四

晉有漢中太守伉嘉

抗 九百十五

後漢有抗徐 泰山都尉抗徐代居丹陽

相 九百十六

姚秦有相雲代居馮翊

黨 九百十七

本出西羌姚秦有將軍黨耐虎自云夏后氏之後

代為羌豪

賞 九百十八
職尚反

姓苑云賞吳中八族晉有賞慶

望

九百十九

風俗通云齊太公望之後

曠

九百二十

風俗通云師曠之後

浪

九百二十一

晉書永嘉末張平保青州為其下浪逢所殺

鄧

九百二十二

姓纂曼姓殷時侯國也春秋時鄧侯吾離朝魯後為
楚文王所滅子孫以國為氏

左傳襄三年楚子重伐吳使鄧廖帥組甲三百被練三
千侵吳

後漢鄧晨字偉卿南陽新野人世吏二千石光武拜為
汝南太守興鴻卻陂數千頃田汝土以殷魚稻之饒
流行它郡

鄧禹字仲華南陽新野人十三能誦詩杖策見光武曰

願明公威德加四海禹得効尺寸垂功名於竹帛

恢廓有大度授以西討之畧拜前將軍謀謨帷幄

決勝千里封高密侯事母至孝有子十三人各

使守一藝修整閨門教養子孫皆可以為後世法

子訓字平叔少有大志不好文學顯宗以為郎樂施

下士士大夫多歸之遷為校尉待諸胡以恩信訓於

閨門甚嚴兄弟莫不敬憚子隲字昭伯拜車騎將

軍儀同三司始自隲也鄧氏自中興後累世寵貴

凡侯者二十九人公二人大將軍以下十三人中二千石十四人列校二十二人州牧郡守四十八人其餘侍中將大夫郎謁者不勝數

魏志鄧艾字士載屯田積穀行於兩淮開廣漕渠達於江淮落門段谷之戰大破姜維之師 雲徹席卷蕩平巴蜀

蜀志鄧芝字伯苗為廣漢太守清嚴有治績入為尚書子良亦至廣漢太守

晉鄧騫字長真有節操忠信識量宏遠稱為長者 為

司農

鄧嶽字伯山少有將帥才畧為西陽太守廣州刺史

子遐字應遠勇力絕人氣蓋當時歷數郡太守號為
名將襄陽沔水有蛟害人遐入水揮劍截蛟數段

弟逸字茂山亦有武幹廣州刺史

鄧粲長沙人少以高潔著名為荊州別駕

良吏鄧攸字伯道以孝致稱清和平簡貞正寡欲授吳

郡太守載米之郡俸祿無所受惟飲吳水而已 郡
中大饑表振貸未報輒開倉救之 刑政清明百姓
歡悅為中興良守後去郡百姓數千人留牽攸船不
得進吳人歌曰紉如打五鼓雞鳴天欲曙鄧侯拖不留
謝令推不去 轉吏部尚書周急振乏善與人交賓
無貴賤待之若一

鄧元起字仲居為益州刺史勤恤人事口不論財為蜀
土所稱

隱逸鄧郁隱居衡山極峻之嶺斷穀三十餘載

北史鄧彥海性貞素言行可復博覽經書道武遷尚

書吏部郎

唐鄧世隆相州人亡命變姓名號隱玄先生棲白鹿山

貞觀初為修史學士

鄧處訥字仲韞邵州人少從江西人閔頊防秋後昭宗

武安節度使

甯 九百二三

姓纂衛康叔之後至武公生季亶食采於甯弟須叔
生跪孫速生武子俞生殖生喜九代卿族齊有甯戚
周有甯越

左傳陽處父聘於衛甯羸從之及溫而還曰天為剛德
猶不干時况在人乎

僖二十六年公會莒茲平公甯莊子盟于向尋泚之盟
也二十八年衛侯與元咺訟衛侯不勝謂甯俞忠而
免之

襄元年仲孫蔑會晉欒黶衛甯殖圍宋彭城

文四年衛甯武子來聘公與之宴為賦湛露及彤弓

論語甯武子邦有道則知邦無道則愚其知可及也其愚不可及也

甯武子名俞衛卿也 甯殖衛卿是曰甯惠子

甯悼子名喜 甯子視君如奕棊

新序齊桓公郊迎客夜開門執火甚盛甯戚飯牛於車下擊牛角疾商歌公聞之命後車載之賜之衣冠將見

之甯戚見說桓公以合境內明日復見說桓公以為天下桓公大悅遂授之以為卿

前漢酷吏甯成南陽穰人好氣為小吏必陵其長吏為上操下急如東溼為濟南都尉其治如狼牧羊寧見乳虎無直甯成之怒

敬 九百二四

姓纂陳厲公子敬仲之後以謚為姓姓苑云黃帝孫敬康之後秦有敬丕子教為平陽太守子孫因家平

陽

北史敬顯雋字孝英少英俠從齊神武舉義歷位度支
尚書出內多歷顯官所在著名稱子長瑜為廣陵

太守

循吏敬肅字敬儉少以貞介知名仕隋為安陵令有能
名擢拜秦州司馬轉幽州長史俱有異績心如鐵

石至老而彌篤

附柳
儉傳

唐敬暉字仲暉絳州平陽人弱冠舉明經為衛州刺史

時河北經突厥所騷方秋而城暉曰豈有棄農畝事
池隍哉縱民歸歛闔部賴安以誅二張功封平陽郡

王

敬君弘以兵屯營守玄武門

敬播蒲州人遷太子司議郎時初置是官尤清近中書
令馬周嘆曰恨資品妄高不得歷此職房玄齡稱陳
壽之流玄齡患漢書文繁令撮其要為四十篇當時
治漢書者非其授以為無法云



名賢氏族言行類稿卷四十六

欽定四庫全書

子部

名賢氏族言行類稿卷四十九

七至

詳校官典籍臣潘奕雋

主事臣祁韻士覆勘

總校官進士臣朱鈐

校對官中書臣張曾炳

謄錄監生臣王宮

欽定四庫全書

名賢氏族言行類稿卷四十七

宋 章定 撰

鄭

九百二十五

姓篡周厲王少子友受封於鄭是為桓公在畿內今
華州鄭縣是也生武公與晉文侯夾輔平王東遷於
洛徙溱洧之間謂之新鄭傳十三代至幽公為韓所
滅子孫播於陳宋以國為氏

揚子谷口鄭子真不屈其志處巖石之下名震於京師
史記鄭當時字莊陳人也任俠自喜聲聞梁楚之間為
太子舍人常置驛馬長安諸郊其知友皆天下有名
之士誠門下客至無貴賤無留門者執賓主之禮以其
貴下人

前漢鄭弘字穉卿泰山剛人與兄次卿皆明經通法律
政事次卿為太原涿郡太守弘為南陽太守皆著治
條教法度為後所述弘以高第入為右扶風京師稱

之為御史大夫

鄭吉會稽人以卒伍從軍為人彊執習外國事破車師
降日逐威振西域

鄭崇字子游哀帝時為尚書僕射每見曳革履上笑曰識
鄭尚書履聲 臣門如市臣心如水

後漢鄭弘字巨君會稽山陰人太守第五倫奇之署督
郵舉孝廉拜駟令政有仁惠民稱蘇息遷淮陰太守
前漢所陳有補王政者皆著之南宮以為故事後太

尉五倫為司空班次在下每朝見弘曲躬自卑帝問其故遂聽置雲母屏風分隔其間

鄭玄字康成北海高密人從馬融質疑義問畢辭歸融曰鄭生今去吾道東矣孔融深敬之告高密縣為玄特立一鄉曰鄭公鄉門閭號通德門夢孔子告之曰起起今年歲在辰來年歲在己既寤以讖合之知命當終其年遂卒經傳洽熟稱為純儒

鄭興字少贛河南人晚善左氏傳同學者皆師之數

言政事依經守義文章溫雅 世言左氏者多祖于
興而賈逵傳其父業故有鄭賈之學

鄭衆字仲師顯宗遣使匈奴虜欲令拜衆不為屈不忍
大漢節對氊表獨拜

鄭泰字公業少有才畧交結豪傑家富於財有田四百
頃而食常不足名聞山東為尚書侍郎遷侍御史

宦者鄭衆字季產為人謹敏有心幾一心王室不事豪
黨遷太常與議事中官用權自衆始

魏志鄭渾字文公為邵陵令課耕桑重去子之法所育
男女多以鄭為字 遷陽平沛郡二太守興陂遏開
稻田民賴其利刻石頌之號鄭陂

晉鄭冲字文和博究儒術百家之言補陳留太守以儒
雅為德 位太傅封壽光公

鄭表字林叔父泰揚州刺史有高名表早有識鑒荀攸
見之曰鄭公業為不亡矣 為黎陽令吏民悅服太
守特見甄異為諸縣之最轉濟陰太守下車旌表孝

悌興立庠序 為廣平太守以德化為先郡中愛之
徵拜侍中百姓戀慕涕泣路隅後拜光祿大夫儀同
三司 子默字思元起家秘書郎考覈舊文剛省浮
穢虞松曰而今而後朱紫別矣 為東郡太守值歲
飢輒開倉賑給朝廷嘉其憂國 凡五升九卿 默

子球字子瑜

南史鄭鮮之字道子累遷御史中丞性剛直甚得司直
之體宋初遷都官尚書 時傅亮謝晦位遇日隆范

秦嘗誚鮮之曰卿與傅謝俱從聖主有功闕洛今日
荅颯去人遼遠何不肖之甚 後至右僕射 子愔

始安太守

鄭紹叔字仲明為安豐令有能名 仕梁為衛尉卿忠
於事上所聞纖毫無隱 傾心接物多所舉薦

鄭灼字茂昭勵志儒學尤明三禮仕陳兼國子博士

北史鄭義字幼麟開封人文成末拜中書博士後為兗
州刺史政以賄成西門受羊酒東門沽賣之 子懿

字景伯聞雅有政才為孝文所器遇拜黃門侍郎出
為齊州刺史 弟道昭字僖伯孝文饗侍臣與兄懿
俱侍坐孝文歌曰白日光天兮無不曜江左一隅獨未
照懿歌曰雲雷大振兮天門闢率土來賓一正歷道
昭歌曰皇風一鼓兮九地匝戴日依天清六合 累遷
國子祭酒歷光青二州刺史 子述祖字恭文有風
檢為先達所稱譽齊遷兗州刺史 父亦嘗為此
州百姓歌曰大鄭公小鄭公相去五十載風教猶相

同 及病曰一生富貴足矣以清白之名遺子孫
死無所恨

鄭道邕字孝穆以清約自居行岐州刺史留情綏撫績
為天下最周文帝歎美之徵為京兆尹 子譚字正
義位至上柱國隋文立有定策之功

鄭偉字子直個儻有大志每以功名自許後為華州刺
史前後泣職皆以威猛為政吏人莫敢犯禁盜賊亦
為之休止

鄭頤字子默天保中遷中書侍郎

隱逸鄭修少隱於岐南凡谷不交世俗雅好經史專意

玄門

唐鄭善果鄭州人為魯郡太守母崔氏賢明曉政治嘗
坐閣內聽處決中理則悅有不可引至牀下責愧之
故善果所至有績號清吏

鄭元璠字德芳善果從父兄諭罷可汗兵數年始得還
帝勞曰卿不辱於虜輩蘇張矣拜鴻臚卿突厥攻

太原詔元琦持節往既至虜以不信咎中國元琦隨語折讓無所屈太宗賜書曰知公口伐可汗如約遂使邊火息燧朕何惜金石賜於公哉後轉左武侯大將軍鄭權汴州人擢進士第佐涇原節度劉昌府昌入朝度其軍必亂以權寬厚容衆留主後務昌去軍果亂權挺身明諭殺首亂者一軍畏伏 穆宗立持節為回鶻告哀使權識詣魁然有閎辨與可汗爭曲直持議明壯虜禮異之

鄭餘慶字居業鄭州人三世皆顯宦少善屬文擢進士
第憲宗立復平章事遷尚書僕射餘慶以宿德進公
論浩然歸重少砥礪行己完潔仕四朝其祿悉周
所親常語人曰祿不及親友而侈僕妾者吾鄙之後
生內謁必引見諄諄教以經義務成就儒學奏議類
用古言從父綰第在南餘慶第在北世謂南鄭相
北鄭相云子濟

鄭澣本名涵第進士遷右補闕敢言無所諱憲宗嘗謂

餘慶曰涵卿令子而朕直臣也可更相賀 為侍講
學士帝使梓擷經史為要錄愛其博而精進尚書左
丞子處誨從謹

鄭處誨字廷美文辭秀拔撰明皇雜錄為時所傳

鄭從謹字正求及進士第進門下侍郎沙陀都督李國
昌擾邊朝廷以為憂乃拜從謹為節度兼招討使自
擇參佐皆一時選士人比太原為小朝廷言得才多
也時新亂之後日有殺掠從謹貌溫而氣勁多謀而

善斷將士欲為惡者輒先覺誅之軍中由是遂安時
鄭畋以宰相鎮鳳翔移檄討賊兩人以忠義相提賊
尤憚之號二鄭云

鄭珣瑜字元伯鄭州人大厯中以諷諫主文科高第四
遷禮部侍郎為河南尹性嚴重少言未嘗以私託人
人不敢謁以私既至清靜惠下賤歛貴發以便民

治河南比張延賞而重厚堅正過之進門下侍郎同平
章事李實為京兆尹剝下務進奉珣瑜顯詰曰進奉

出何色邪子覃

鄭覃以父蔭補累諫議大夫文宗召為翰林侍講學士
於經術該深諄篤守正帝尤重之同平章事病俗浮
夸又言文人多佻薄 帝嘗謂百司不可使一日弛
惰覃曰救世之敝在先責實 帝坐延英論詩工否
曰孔子所刪三百篇其非雅正者烏足為天子道哉
以宰相領祭酒請太學五經置博士 所居第不加飾
侍講每以厚風俗黜朋比再三為天子言 始以經

籍利繆建言願與鉅學鴻生共力讎刊太學示後世法
詔可

鄭朗字有融覃弟起居郎文宗與宰相議政見朗執筆
螭頭謂曰向所論事亦將記之乎朗曰臣執筆所書
者史也故事天子不觀史始舉進士相者言君當
貴然不以科第進俄而有司擢朗第一既又覆實被
放相者賀曰安之已而果相

鄭綱字文明幼有奇才善屬文所交皆天下名士擢進

士宏辭高第遷中書舍人奏罷統軍用麻帝見綱曰
宰相不能拒中人得卿言乃悟 帝召綱草立太子
詔綱不請輒書曰立嫡以長跪白之帝領乃定 本
以儒術進守道寡欲所居不為烜赫事以篤實稱善
名理學世以耆德推之

鄭薰字子溥擢進士第累吏部侍郎時數大赦階正議
光祿大夫者得蔭一子門施戟薰却之不肯叙 端
勁再知禮部舉引寒俊士類多之既老號所居為隱

巖蒔松於庭號七松處士

鄭肅字又敬第進士書判拔萃擢太常少卿有疑議往
咨必據經條答 臨義不可奪挺挺有大臣節同平
章事與李德裕叶心輔政 子仁表豪爽有文嘗以
門閥文章自高曰天瑞有五色雲人瑞有鄭仁表

鄭縈字蘊武及進士第補廬州刺史黃巢掠淮南縈檄
請無犯州境巢笑為斂兵州獨完僖宗嘉之歲獲羸
錢千緡藏州庫後它盜至終不犯鄭使君錢大順後

王政微每以詩謔託諷其語多俳諧故使落調世號
鄭五歇後體後忽拜相宗戚詣慶縻搔首曰歇後鄭
五作宰相時事可知矣

鄭畋字台文舉進士時甚少有司上第籍武宗疑索所
試自省乃可奏為宣武推官以書判拔萃擢渭南尉
劉瞻薦入翰林為學士知制誥書詔紛委畋思不
淹畧成文燦然無不切機要當時推之進同平章
事明年為鳳翔節度使募銳兵五百號疾雷將境中

盜不敢發會黃巢陷東都帝出梁洋畋上謁曰將相
俟國臣請死以懲無狀帝勞遣畋曰臣當以死報國
中和元年賊將王璠率衆三萬來攻畋設伏以待
璠遁去擒其子斬之威動京師巢大懼不敢西謀當
此時微畋天子幾殆帝聞捷曰朕知畋不盡儒者之
勇乃爾 為人仁恕姿采如峙玉

鄭欽說試五經擢第初梁任昉大同四年七月於鍾山
壙中得銘曰云云時莫能辨者昉五世孫升之寫以

授欽說欽說出使得之於長樂驛至敷水三十里而悟曰云云升之大驚其智

鄭虔鄭州人掇當世事著書八十餘篇玄宗愛其才為置廣文館以虔為博士宰相曰今後世言廣文博士自君始虔乃就職 追紬故書可誌者得四十餘篇 蘇源明名其書為會粹 善圖山水好書常苦無紙貯柿葉數屋歲久殆遍嘗自寫其詩并畫以獻帝大書其尾曰鄭虔三絕 學長於地里山川險易兵戍

無不詳嘗撰天寶軍防錄言典事該諸儒服其善著
書時號鄭廣文在官貧約淡如也杜甫嘗贈以詩曰
才名四十年坐客寒無氈云

五代鄭仁誨字日新太原晉陽人也初事唐將陳紹光
紹光為人驍勇而好使酒嘗因醉怒仁誨拔劍欲殺
之左右皆奔走仁誨植立不動無懼色紹光擲劍於
地撫仁誨曰汝有器量必富貴非吾所及也 漢高
祖為河東節度使周太祖居帳下時時往過仁誨與

語甚懼每事有疑即從仁誨質問仁誨所對不阿周太祖益奇之漢興周太祖為樞密使乃召仁誨用之顯德元年拜樞密使世宗攻河東仁誨留守東郡明年冬以疾卒

宋朝鄭獬字毅夫安州安陸人也為人俊邁不羣舉進士第一授將作監丞通判陳州召試直集賢院修起居注遂以右司諫知制誥京師大雨水詔求直言獬上疏曰臣竊觀陛下發德音下明詔以求忠言然

臣愚未知陛下將欲實用之邪抑欲因災異舉應故事以文之邪苟欲文之則固無可議必欲實用之則於此時四方交草累疏繁叢委至而陛下以一日萬幾之餘未能周覽亦不過如平時章疏關機密者則留中不出繫政體者則下中書屬兵機者則下樞密院兩府覆奏又以下羣有司及郡邑卒無所施行而後止如是則有求諫之名而無求諫之實所謂應故事者等耳以臣所謂宜選官屬令專掌羣臣所上章

疏日許兩府及臣畜休便直便殿坐與之從容條講
其可者則熟究而行之不可則罷之有疑焉則廣詢
而後決之使羣臣得而衆事舉此應天之實也 出

知荆南府至神宗即位除翰林學士知開封府王安石
參知政事不悅獬宰相富弼在告遂除獬翰林侍讀
學士知杭州徙青州以疾提舉鴻慶宮卒

鄭居中字達夫開封人也舉進士大觀元年拜同知樞
密以鄭貴妃親嫌除中太一宮使宣和二年進少師

封宿國公 初遼國叛臣李良嗣來歸陳滅燕之策
蔡京童貫主其事時居中為相力陳不可又謂京曰
朝廷議夾攻大遼此出李良嗣欲快己意爾公為大
臣國之元老不能守兩國盟約輒造事端誠非妙算
且本朝與遼國通好五十年兵不識刃農不加役
漢唐和戎未有如我宋之盛公何以遽興此舉公今
若尊上棄約復燕無乃不可乎京曰惟上厭歲幣五
十萬之多故有此意居中曰公獨不思漢世和戎用

兵之費乎使百萬生靈肝腦塗地公實為之由是議
稍寢後復議舉兵燕山平進位太保不拜卒贈太師
諡文正帝親表其隧曰政和寅亮醇儒宰臣文正鄭
居中之墓 子修年億年皆至侍從億年靖康之
難沒於金晚得南歸高宗擢為資政殿大學士位
視執政

文藝鄭文寶字仲賢南唐以文知名後舉進士召為殿
中丞為陝西轉運使寇準謂其熟西事

卓行鄭俠字介夫福州福清人也嘗從王安石學舉進士調光州司法參軍至京師會安石秉政俠見安石具言青苗免役保甲用兵之害不答又數以書論之久之得監安上門安石猶使其子雱與其客黎東美諭意俠曰果欲援俠成就之取所獻利民便物之事行其一二使進而無愧不亦善乎是時久不雨流民愁苦萬狀俠乃繪為圖奏疏上之銀臺司翌日罷保甲等十有八事民間歡呼相賀越三日大雨沾

足 暇日聞子姪誦詩考槃之義曰弗諉者弗忘君之惡弗過者弗過君之朝弗告者弗告君之善碩人之於君有卷卷之不忍也故永矢以絕之俠歎曰是何言與古之人在畎畝不忘其君況於賢者一不用而怨戾若是哉盖弗諉者弗忘君也弗過者弗以君為過也弗告者弗以告他人也其存心如此

孟

九百二十六

姓纂魯桓公子慶父之後號曰孟孫因以為氏又衛

公長子孟縶之後亦曰孟氏鄒有孟軻字子輿

闕

秦孟說

左傳昭四年孟孫為司空以書勳

成十六年宣伯曰魯之有季孟猶晉之有欒范也政令
於是乎成

文公二年秦伯用孟明視增修國政重施於民 三年
秦伯伐晉濟河焚舟晉人不出遂自茅津濟封殽尸
而還遂伯西戎用孟明也

論語孟懿子問孝 孟武伯問孝 孟公綽為趙魏老

則優

孟子孟施舍之養勇也曰視不勝猶勝也量敵而後進
慮勝而後會 孟施舍似曾子

新序魯孟獻子聘於晉宣子觴之曰子之家孰與我家
富獻子曰吾家甚貧惟有二士曰顏回茲無靈者使
吾邦家安平百姓和協惟此二者耳吾盡於此矣容
出宣子曰彼君子也以養賢為富我鄙人也以鐘石

金玉為富孔子聞之曰孟獻子之富其著於春秋宜矣

前漢儒林孟卿善為禮春秋子喜字長卿父使喜從田王孫受易喜好自稱譽有施孟梁丘之學

後漢孟敏字叔建荷甑墮地不顧而去郭林宗問其意甑已破矣視之何益林宗異之因勸令學十年知名公俱辟並不屈

孟嘗字伯周會稽人為合浦太守海出珠寶先宰守採

求不知紀極珠漸徙於交趾界嘗到官易前敝未踰
歲去珠復還

蜀志孟光字孝裕博物識古無書不覽 讀書當務閱

遠者 位至大司農

晉孟觀字叔時東光人少好讀書解天文 為黃門侍

郎遷積弩將軍封上谷郡公

隱逸孟陋字少孤武昌人吳司空宗曾孫兄嘉征西長

史陋少而貞立清操絕倫以文籍自娛口不及世事

喪母毀瘠殆於滅性 名著海內命為參軍稱疾不起

南史孟懷玉從武帝平京口定建鄴以功封鄱陽縣侯弟龍符驍果有膽氣早為武帝所知

孟顓字彥重衛將軍昶之弟昶顓並美風姿時人謂之

雙珠

見謝靈運傳

北史孟表字武達歸魏除兗州刺史領馬頭太守

孟威字能重累遷沃野鎮將

孟信字修仁家世傳儒學而未有通官遂棄書從軍仕
魏為趙平太守政尚寬和

循吏孟業字敬業齊清河王岳召為法曹及謁見岳心
鄙其眇小後尋業斷決處謂曰卿斷決之明可謂有
過軀貌之用 遷東郡太守以寬惠著名麥一莖五
穗嘉禾一莖九穗咸以為政化所感

唐孟簡字幾道德州人舉進士宏辭連中元和中拜諫
議大夫知匭事為常州刺史州有孟漬久淤闕簡治

導溉民田凡四千頃以勞賜金紫以工部侍郎召
還尤工於詩游江淮間尚節義與之交者雖歿視
卹其孤不少衰

孟郊字東野湖州人性孤介少諧合韓愈一見為忘形
交年五十得進士第調溧陽尉笠澤叢書李賀記
為兒時在溧陽聞白頭書佐云孟東野貞元中為尉
溧陽昔為平陵縣縣南五里有投金瀨瀨南八里有
故平陵城周千餘步基址坡陀才高三四尺而草木

甚盛率多大樸叢篠蒙翳如塢如洞其池窪下積水
沮洳深處可活魚鼈幽邃可喜東野得之忘歸 郊
為詩有理最為愈所稱 卒張籍謚曰貞曜先生

孟浩然少好節義隱鹿門山年四十乃游京師嘗太學
賦詩一座嘆伏王維私邀入內署俄玄宗至浩然匿
牀下維以實對帝喜曰朕聞其人而未見也詔出帝
問其詩浩然自誦所為至不才明主棄之句帝曰卿
不求仕而朕未嘗棄卿柰何誣我因放還王維過郢

州畫像於刺史亭因曰浩然亭更曰孟亭

盛

九百二十七

姓纂周同姓國也為齊所滅穆天子傳盛姬之國也
羊傳云成降于齊師成者盛也諱滅同姓故言成也
有司徒盛吉後漢有盛道

晉書盛彥字翁子廣陵人年八歲答戴昌贈詩甚慷慨
母疾失明食必自哺之為本邑大中正

唐盛彥師宋州人少任俠隋末為澄城長高祖授為行

軍總管從平京師與史萬寶鎮宜陽李宓叛萬寶懼
彥師笑曰請以數千兵為公梟首遂斬宓以功封葛

國公

宋朝盛度字公量杭州餘杭人也舉進士稍遷至直史
館司戶部判官契丹犯邊數上疏論邊事奉使陝西
參質漢唐故地繪為西域圖以獻旋遷知制誥嘗奏
事便殿真宗問其所上西域圖內出絹命工別繪度
因言前已圖漢所置酒泉張掖武威燉煌金城五郡

比復究尋五郡之東南自秦築長城西起臨洮東至
遼碣延袤萬里有郡有軍有守提襟帶相屬烽火相
望其形勢備禦亦至矣唐始置節度使後又以宰相
兼領用非其人有河山之險而不能固有兵甲之利
而不能禦豈不惜哉乃復繪其山川道路區聚壁壘
為河西隴右圖以獻為翰林學士景祐二年拜參知
政事後知應天府以太子少傅致仕卒謚文肅

正 九百二八

宋正考父之後魏志永昌太守正帛

慶 九百二十九

姓苑公族慶父之後有慶封 封字子家齊相聘魯車

盛美 晉有大夫慶鄭

聖 九百三十

見姓苑

竟 九百三一

姓苑竟氏楚人

名賢氏族言行類稿卷四十七

欽定四庫全書

名賢氏族言行類稿卷四十八

宋 章定 撰

寇 九百三二

姓纂周有蘇忿生為司寇子孫以官氏一云衛康叔
為周司寇支孫以官氏焉秦滅衛角家於上谷八代
孫恂

後漢寇恂字子翼上谷人文武備足有牧人御衆之才

拜河內太守以輦車驪駕轉輸軍食前後不絕 拜

汝南太守盜賊清靜郡中無事恂素好學乃修鄉校

教生徒光武南征恂從至潁川百姓遮道曰願從陛

下復借寇君一年 經明行修名重朝廷所得秩奉

厚施朋友故人時人稱其長者以為有宰相器 曾

孫榮

北史寇讚字奉國父修之字延期苻堅東萊太守 弟

謙有道術太武敬重之 讚少以清潔知名姿容嚴

疑拜雍州刺史流人極負自遠而至參倍於前

寇雋字祖雋寬雅有識量不以財利為心後為梁州刺史令郡縣立庠序勸耕桑敦禮讓數年之中風俗頓革

寇洛累世為將吏

宋朝寇準字平仲華州下邳人也少力學有器識舉進士為巴東令巴東有秋風亭準折韋應物一言為二句野水無人渡孤舟盡日橫識者知其必大用在巴

東久不得代又宰成安賦役期會書鄉里姓名揭之
示人無違者遷殿中丞通判鄆州召試右正言直史
館為戶部度支推官會詔百官言邊事準極陳利害
太宗嘉之擢樞密直學士淳化二年大旱太宗延近
臣問政得失準對曰有二臣者犯法一死一不問後
知相州徙安州貶道州司馬再貶雷州司戶參軍丁
謂使齋敕往授之以錦囊貯劍揭於馬前既至準方
與郡宴驛吏言狀羣官皆竦懼出迎中使避不見問

其所以來之故不答上下益懼準神色自若使人謂之曰朝廷若賜準死願見敕書中使不得已乃以敕示準準拜於庭升階復宴人服其量準至雷州吏以圖經獻視其四至云東南至海十里準恍然曰吾少時有到海只十里過山應萬重之句人生得喪豈偶然哉卒年六十三詔許歸葬西京過公安民擁道設祭立竹焚紙月餘枯竹皆自生邑民嗟嘆即生竹地立祠歲時享之謂其竹曰冠公竹歲久成林人不忍

伐 仁宗對輔臣哀準以忠死贈中書令萊國公諡
曰忠愍無子以從子隨為後隨終於殿中丞

富 九百三二

姓纂左傳周大夫富辰之後又魯大夫富父終生之
後亦單姓富鄭大夫有富子前漢韋賢傳有陳留太
守富允文

唐富嘉謨武功人舉進士尉晉陽與吳少微魏谷倚並
負文詞時稱北京三傑天下文章尚徐庾獨吳少微

嘉謨本經術雅厚雄邁人爭慕之號吳富體章嗣立
薦並為左臺監察御史

宋朝富弼字彥國河南人也幼篤學有大度范仲淹見
而識之曰此王佐才也懷其文以示王曾晏殊殊即
以女妻之舉茂才異等授將作監丞知長水縣簽書
河陽節度判官會郭皇后廢范仲淹爭之貶知睦州
弼言朝廷一舉而獲二過縱不能復后宜還仲淹以
來忠言召為開封府推官擢知諫院康定元年日食

正旦弼言請罷燕徹樂雖北使在館亦宜就賜飲食而已執政以為不可弼曰萬一契丹行之為朝廷羞後使北還者云契丹罷燕如弼言仁宗深悔之初宰相惡聞忠言下令禁越職言事弼因論日食以謂應天變莫若通下情遂除其禁慶曆二年改右正言知制誥契丹聚重兵境上遣其臣蕭英劉六符來求關南地兵既壓境而使來非時中外忿宰相舉弼使契丹弼即入對便殿弼叩頭曰主憂臣辱臣不敢愛其

死乃以弼為接伴弼開誠與語不以異俗待之英等
見弼傾蓋亦不復隱其情屏去左右密以其主所欲
得者告弼且曰可從從之不可從更以一事塞之弼
具以聞仁宗命御史中丞賈昌朝館伴不許割地而
許增歲幣以弼為樞密直學士辭不拜假資政殿學
士戶部侍郎使契丹既至六符館之往反十數皆論
割地必不可狀及見契丹問故契丹曰南朝違約塞
雁門增塘水治城隍藉民兵此何意也羣臣請舉兵

遂南寡人以謂不若遣使求地求而不獲舉兵未晚也弼曰北朝忘章聖皇帝之德乎澶淵之役若從諸將言北兵無得脫者且北朝與中國通好則人主專其利而臣下無所獲若用兵則利歸臣下而人主任其禍故北朝諸臣爭勸用兵者此皆其身謀非國計也契丹驚曰何謂也弼曰晉高祖欺天叛君而求助於北末帝昏亂神人棄之是時中國狹小上下離叛故契丹得肆其暴橫擄獲金帛充牣諸臣之家而壯

士健馬物故大半此誰任其禍者今中國提封萬里
所在精兵以百萬計法令修明上下一心北朝欲用
兵能保其必勝乎曰不能弼曰勝負未可知就使勝
所亡士馬羣臣當之歟抑人主當之歟若通好不絕
歲幣盡歸人主臣下所得止奉使者歲一二人耳羣
臣何利焉契丹大悟首肯者久之遂欲求婚弼曰婚
姻易以生隙人命修短不可知不若歲幣之堅久也
本朝長公主出降齋送不過十萬緡豈若歲幣無窮

之獲哉契丹曰卿且歸矣再來當擇一受之卿其遂以誓書來弼歸復命再聘乃不復求婚專欲增幣仁宗從之增歲幣二十萬神宗問為治所先弼曰阜安寓內為先明年除司空兼侍中弼力辭復拜左僕射同平章事有於上前言災異皆天數非人事得失所至者弼聞之嘆曰人君所畏惟天若不畏天何事不可為者云亂亡無幾矣此必姦臣欲進邪說故先導上以無所畏使輔弼諫諍之臣無所復施其力此治

亂之幾也吾不可以不速救即上書數千言雜引春秋洪範及古今傳記人情物理以明其決不然者堯諡文忠元祐初加贈太師配饗神宗廟廷請老家居凡三上章皆言天子無職事惟辨君子小人而進退之此天子之職也君子與小人並處其勢必不勝君子不勝則奉身而退樂道無悶小人不勝則必交結干歧萬轍必勝而後已小人復勝必遂肆毒於良善無所不為求天下不亂不可得也子紹庭紹京紹

隆 紹庭字德先事徽宗除祠部員外郎有子直柔
紹京供備庫副使 紹隆光祿寺丞

竇

九百三四

姓纂姒姓少康之後帝相遭有窮氏之難其妃后緡
方娠逃出自竇而生少康支孫以竇為氏至周世為
大夫

前漢竇嬰字王孫喜賓客拜將軍賜金千斤陳廊廡下
軍吏過輒令財取為用金無入家者 遊士賓客爭

歸之 每朝議大事列侯莫敢與抗禮 封魏其侯
後漢竇融字周公扶風人行河西五郡大將軍事 光
武授為涼州牧 封安豐侯 光武賜融璽書又賜
外屬圖又詔報曰吾與將軍如左右手耳 賞賜恩
寵傾動京師竇氏一公兩侯三公主四二千石融在
宿衛十餘年

竇固字孟孫好覽書傳喜兵法封顯親侯 明習邊事
羌民服其恩信 徵為大鴻臚

竇憲字伯度拜車騎將軍 躡冒頓之區落焚老上之
龍庭 一舉而空朔庭 乃追奔稽落之表飲馬北
靛之曲銘石負鼎薦告宗廟憲登燕然山去塞三千
餘里刻石勒功紀漢威德班固作銘云云封冠軍侯
贊曰聽笳龍庭鏤石燕然

竇章字伯向少好學有文章與馬融崔瑗同好太僕鄧
康欲與交不肯往是時學者稱東觀為老氏藏室道
家蓬萊山康遂薦入為校書郎 轉大鴻臚

竇武字游平拜城門校尉在位多辟名士清身疾惡禮
賂不通 靈帝立拜大將軍封聞喜侯

北史竇瑾字道瑜衛國人少以文學知名自中書博士
為中書侍郎進爵衛國侯拜長安鎮將毘陵公在鎮
八年甚著威惠為殿中都官典左右執法太武歎曰
國之良輔毘陵公之謂矣出為冀州刺史 子遵善
楷篆北京諸碑及臺殿樓觀宮門題署多遵書位濮
陽太守

竇秦字世寧太安捍殊人母夢風雷暴起若有雨狀出
庭觀之見電光奪目駛雨霑灑寤而驚汗遂有娠暮
而不產大懼有巫曰度河湔裙產子必易便向水所
忽見一人曰當生貴子可徙而南母從之俄而生秦
及長善騎射有勇畧 神武之為晉州請秦為鎮城
都督累遷侍中京畿大都督尋領御史中尉秦以勲
戚居臺雖無多糾舉而百寮畏懼 秦妻武明婁后
妹也秦雖以親見待而功名自建皇建初配享神武

廟庭 子孝敬嗣位儀同三司

循吏竇瑗字世珍除廣漢太守政有清白之稱終始全
潔

唐竇威字文蔚岐州人家世貴子弟皆喜武力獨威尚
文諸子詆為書癡 授祕書郎當遷不肯調者十年
其學益博時禮典湮闕威多識朝廷故事乃裁定制
度帝語裴寂曰威今之叔孫通也授內史令 威性
儉素家不樹產

竇軌字士則威凡子貞觀元年出為洛州都督因隋亂
人不土著軌下令諸縣有游手末作者按之由是威
信大行民皆趨本

竇抗字道生美容儀性通率以帝甥早貴後從秦王平
薛舉功第一又從征王世充東都平冊勲於廟者九
人抗與從弟軌與焉 子誕

竇靜字元休高祖入京師擢并州大總管府長史時突
厥數為邊患糧道不屬靜表請屯田太原以省餽運

帝從之歲收粟十萬斛 靜上書制突厥詔答曰北
方之事悉以相委以卿為寧朔大使朕無北顧憂矣
竇參字時中誕四世孫學律令為人矜嚴正直果於斷
制由監察御史入為中丞舉劾無所回忌俄平章事
參除吏多聽族子申故申所至人以為喜鵲 德宗
數見語天下事或決大議帝器之

竇易直京兆人擢明經補校書郎十年不應辟以判入
等及執政未嘗引用親黨

宋朝竇儀字可象薊州漁陽人也父禹鈞在周為諫議大夫五子曰儀儼侃偁僖皆相繼登科時人謂之竇氏五龍儀少舉進士宋興遷工部尚書太祖謂宰相曰深嚴之地當以宿儒處之范質曰竇儀清介重厚然已自翰林遷端明矣太祖曰禁中非此人不可卿當諭以朕意即日再入翰林為學士范質等三相罷越三日命趙普為相制既下太祖問學士曰質等已罷普敕何官當書承旨陶穀時任尚書乃建議以

為自古輔相未嘗虛位唯唐太和九年甘露事後數日無宰相惟左僕射令狐楚右僕射鄭覃刑部尚書王源中奉行書今尚書乃南省六官之長可以書敕儀曰穀所陳承平之制今皇弟開封尹同平章事即宰相之任也太祖曰儀言是即命太宗書敕以賜普加禮部尚書贈右僕射初太祖之克滁州也世宗遣儀籍府庫後數日太祖令親吏取藏中絹給麾下儀曰當城下之初雖傾藏取之無妨也今既籍在官非

有詔不可得也太祖以是重之後欲用以為相未及用而卒侃至起居郎僖至右補闕

竇儼字望之幼能屬文舉進士為天平軍掌書記拜左拾遺仕漢為史館編修官入周又拜中書舍人世宗甚重之拜翰林學士國初就轉禮部侍郎當是時祠祀樂章宗廟諡號多所考定卒年四十二儼博物治聞通音律歷數盧多遜揚徽之為拾遺儼嘗謂之曰丁卯歲五星聚奎自此太平矣二拾遺見之儼不與

也已而果然

竇偁字日彰舉進士為單州判官國初由歸德軍節度判官拜右補闕知宋州時太宗領開封尹以偁為判官賈琰為推官一日太宗燕射偁琰與而琰贊美過甚偁斥之曰賈氏子導諛豈不自媿坐上皆失色因罷宴後拜參知政事入謝太宗曰汝何由至此偁曰陛下不忘藩邸之舊太宗曰非也乃獎汝面折賈琰耳偁嘗與丁顥同幕顥子謂尚幼偁見之曰此子後

必以文致遠即以其子妻之謂果至宰相

豆 九百三五

北史豆代田代人也明元時以善騎射為內細射從攻武

牢射賊矢不虛發後拜勇武將軍

廖

九百三六
力救反

風俗通古有廖叔安左傳作颺盖其後也

後漢方術廖扶字文起汝南平輿人習詩書教授常數
百人尤明天文識緯風角推步之術號為北郭先生

魏志廖立字公淵年未三十擢長沙太守諸葛亮曰廖立楚之良才當贊興世業

宋朝廖剛字用中登崇寧五年進士紹興九年詔為御史中丞時秦檜當國欲假臺諫之力斥逐異己者公先亦為檜所薦及居言路侃然守正無所承望於是廖中丞之名重於天下累世以華髮奉養嘗名堂曰世綵諫議陳公播之聲詩輯之盈編宰相忠簡趙公方務推廣上孝愛之至遂以世綵集進奏上他日

謂公曰觀世緣集誠人間美事也其書至今人間樂傳之

繆

九百三十七

姓纂秦繆公之後以謚為姓或音作穆漢書楚有繆生為元王師

後漢獨行繆彤字豫公兄弟同財業及娶諸婦遂求分異又數鬪爭彤乃掩戶自過諸婦謝罪更為敦睦之行後遷中年令誅諸姦吏及託名貴戚賓客者百有

餘人威名遂行

晉繆播字宣則 弟胤字休祖

繆 九百三八

後漢有繆彤

侯 九百三九

周禮侯人氏子孫因官為姓

晝 九百四十

風俗通齊大夫食采晝邑因氏焉

俞

九百四一

物救反入音逾

吳興漢有俞連東不詳所出

關

九百四二

左傳楚若敖之後有鬬班生伯比生鬬於菟字子文為

楚國令尹

繡

九百四三

漢書游俠傳有繡君賓馬嶺人

副

九百四四

河南後魏官氏志副呂氏改為副氏

救

九百四五

風俗通漢有諫議大夫救父

漏

九百四六

古掌漏之官因以為氏

勾

九百四七

蜀志左將軍宕渠侯勾扶巴人

鄭

九百四八
音懋

越鄮人以郡為姓今明州鄮縣是

闕 九百五十

姓纂齊卿闕止之後

吳志闕澤字德潤會稽山陰人家世農夫至澤好學覽
羣籍兼通歷術 察孝廉除錢塘長遷柳令以勤勞
封都鄉侯

北史闕駟字玄陰燉煌人祖倥父玖並有名西土玖位
會稽令駟博通經傳三史羣言經目則誦人謂之宿

讀沮渠蒙遜重之常侍左右訪以政事損益拜祕書
考課郎中

唐闕稜貌魁雄善用兩刃刀其長丈名曰拍刀一揮數
人前無堅對從杜伏威入朝拜涼州都督

念 九百五一

北史念賢字蓋盧金城枹罕人也美容質頗涉經史居
憂有孝稱 以破衛可瓌功除副將 子華性和厚
有長者風為合州刺史

監 九百五二

風俗通衛康叔之後

名賢氏族言行類稿卷四十八